

ԵՐԵՒԱՆԵՐԻ ՆԿԱՏԱՄԱՔ ԿԱՏԱՐՎԱԾ ՀԱՆՑԱԳՈՐԾՈՒԹՅՈՒՆՆԵՐԻ ՎԻՃԱԿԸ ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆՈՒՄ

Դավիթ Թումայան

ՀՀ քննչական կոմիտեի դեպարտամենտի իրավական ապահովման և վիճակագրական վարչության պետ, իրավ. գիտ. թեկնածու, դոցենտ

Քրեաիրավական պաշտպանությունը մարդու, նրա իրավունքների և ազատությունների պաշտպանությունն է հանցավոր ոտնձգությունից կամ դրանց իրական վտանգից: Քրեաիրավական պաշտպանության ենթակա են ոչ բոլոր հասարակական հարաբերությունները, այլ միայն դրանք, որոնց խախտումը կարող է հանգեցնել լուրջ հետևանքների, կամ որոնք ոտնձգում են առավել արժեք ներկայացնող հարաբերությունները: Ոչ միայն հանցավոր ոտնձգություններից, այլ նաև դրանց իրական վտանգից անձանց պաշտպանության պոզիտիվ պարտականությանն անդրադարձել է նաև Սարդու իրավունքների եվրոպական դատարանը:¹ Դա փաստում է, որ հանցավոր ոտնձգություններից և դրա իրական վտանգից երեխայի և նրա իրավունքների պաշտպանությունը պետք է իրականացվի նաև քրեաիրավական մեխանիզմներով:

Երեխաները, իրենց տարիքային, հոգեբանական, սոցիալական և այլ առանձնահատկություններից ելնելով, պետք է ստանան այնպիսի քրեաիրավական պաշտպանություն, որը կբխի երեխայի լավագույն շահերից և միտված կլինի այդ շահերի պաշտպանությանը:

Հայաստանի Հանրապետությունում առկա է երեխաների պաշտպանության հիմնահարցերին վերաբերող և՛ միջազգային, և՛ ազգային իրավական ծավալուն բազա: Ընդ որում, ՀՀ-ն վավերացրել է երեխաների իրավունքների պաշտպանության ոլորտի հիմնական միջազգային իրավական ակտերը: Դրանց թվին են պատկանում՝

1. Երեխայի իրավունքների մասին Միավորված ազգերի կազմակերպության կոնվենցիան², այդ կոնվենցիայի՝ Մանկավաճառության, երեխաների մարմնավաճառության և մանկական պոռնոգրաֆիայի մասին³ և Զինված հակամարտություններին վերաբերող կամընտիր արձանագրությունները⁴,

2. Անդրազգային կազմակերպված հանցավորության դեմ պայքարի ՄԱԿ-ի կոնվենցիան և դրա կամընտիր՝ Սարդկանց, հատկապես կանանց և երեխաների

¹ Սարդու իրավունքների եվրոպական դատարանն Օսմանն ընդդեմ Մեծ Բրիտանիայի գործով նշել է, որ անձի կամ անձանց պաշտպանությանն ուղղված նախականիչ միջոցառումներ ձեռնարկելու պետության պոզիտիվ պարտականությունը ծագում է այն դեպքում, երբ իշխանությունները գիտեին կամ պարտավոր էին իմանալու մարդու կյանքի իրական և անմիջական ռիսկի գոյության մասին, որը կապված է երրորդ անձանց հանցավոր գործողությունների հետ: Եթե իշխանությունը նման հանգամանքներում, իր իրավասության շրջանակում չի ձեռնարկել այնպիսի միջոցառումներ, որոնք կարող էին օգնել խուսափելու ռիսկից, ապա դա կդիտվի կյանքի իրավունքի խախտում: Դատարանը նշել է, որ այս դեպքում դիմողը պետք է միայն ապացուցի, որ պետությունը չի ձեռնարկել ողջամտորեն ակնկալվող այն միջոցառումները, որոնք նպատակ ունեն խուսափել իրական և անմիջական ռիսկից:

² ՀՀ-ում ուժի մեջ է մտել 1993թ.-ի հունիսի 22-ին:

³ ՀՀ-ում ուժի մեջ է մտել 2005թ.-ի հուլիսի 30-ին:

⁴ ՀՀ-ում ուժի մեջ է մտել 2005թ.-ի մարտի 21-ին:

առևտրի կանխարգելման, արգելման և պատժի մասին թիվ 2 արձանագրությունը¹,

3. Երեխաների պաշտպանության և օտարերկրյա որդեգրման բնագավառում համագործակցության մասին կոնվենցիան (Հաագայի կոնվենցիա)²,

4. Մարդկանց թրաֆիքինգի դեմ պայքարի միջոցների մասին Եվրոպայի խորհրդի 2005թ.-ի կոնվենցիան³,

5. Աշխատանքի միջազգային կազմակերպության (ՄԱԿ) Երեխաների աշխատանքի վատթարագույն ձևերի մասին կոնվենցիան⁴,

6. ԱՄԿ-ի Հարկադիր աշխատանքի վերացման մասին կոնվենցիան⁵ և այլն:

Սեռական շահագործումից և սեռական բնույթի բռնություններից երեխաների պաշտպանության մասին ԵԽ-ի կոնվենցիան⁶ ՀՀ-ն դեռ չի վավերացրել:

Երեխաների պաշտպանության ոլորտին վերաբերող ազգային օրենսդրությունից առանձնահատուկ պետք է նշել հետևյալ իրավական ակտերը՝ ՀՀ քրեական օրենսգիրքը, ՀՀ քրեական դատավարության օրենսգիրքը, ՀՀ ընտանեկան օրենսգիրքը, «Երեխաների իրավունքների մասին» 1996թ. մայիսի 29-ին ընդունված ՀՀ օրենքը:

Երեխայի իրավունքների քրեաիրավական պաշտպանությունն ազգային օրենսդրության մակարդակով իրականացվում է ՀՀ քր. օր.-ով: Մարդու դեմ ուղղված հանցագործությունների բաժնում առանձնացված է ընտանիքի և երեխայի շահերի դեմ ուղղված հանցագործությունների գլուխը, սակայն երեխաների իրավունքների քրեաիրավական պաշտպանությունն իրականացվում է ՀՀ քր. օր.-ի այլ հոդվածներով նույնպես: Երեխայի իրավունքների և ազատությունների քրեաիրավական պաշտպանությունը նախատեսված է, օրինակ, ՀՀ քր. օր.-ի 119-րդ հոդվածի 2-րդ մասի 3-րդ կետով (անչափահասի կամ հանցավորից նյութական կամ այլ կախվածություն ունեցող անձի, ինչպես նաև առևանգված կամ որպես պատանդ վերցված անձի նկատմամբ ֆիզիկական ուժեղ ցավ կամ հոգեկան ուժեղ տառապանք պատճառելը), 124-րդ հոդվածի 2-րդ մասի 2-րդ կետով (վեներական հիվանդությամբ կամ այլ սեռավարակներով վարակելը, որը կատարվել է անչափահասի նկատմամբ) և այլն: Այդ իսկ պատճառով երեխաների դեմ ուղղված հանցագործությունների ուսումնասիրությունը չի սահմանափակում ՀՀ քր. օր.-ի 20-րդ գլխի շրջանակներով, այլ ներառում է նաև այլ գլուխներում նախատեսված հանցագործություններ⁷:

Հարկ է նշել, որ ՀՀ քր. օր. հիմնականում ներառում է ՄԱԿ-ի, ԱՄԿ-ի, ԵԽ-ի կոնվենցիաներով սահմանվող և քրեականացման պահանջ ներկայացնող դրույթները, սակայն առկա են որոշ արարքներ, որոնք դեռ քրեականացված չեն, օրինակ մանկական պոռնոգրաֆիա դիտելը, մանկական մարմնավաճառության ծառայություններից օգուվելը և այլն:

Ձևավորված իրավական բազայի առկայությունը դեռ չի նշանակում, որ այն վերանայման կարիք չունի և չի ունենա, մանավանդ եթե հաշվի առնվեն մարդու իրավունքների պաշտպանության միտումները: Ինչպես արդարացիորեն նշվել է, Երեխայի իրավունքների մասին կոնվենցիայի ընդունմամբ ավարտվեց երեխայի իրավունքների պաշտպանության կոնցեպտուալ հիմքերի ձևավորումը: Եվ թեև Երեխայի իրավունքների մասին կոնվենցիայում արդեն իսկ ամրագրվել է երեխայի իրավունքների բավականին լայն շրջանակ, այնուամենայնիվ երեխայի իրավունքներ-

¹ ՀՀ-ում ուժի մեջ է մտել 2003թ.-ի դեկտեմբերի 25-ին:

² ՀՀ-ում ուժի մեջ է մտել 2007թ.-ի հունիսի 1-ին:

³ ՀՀ-ում ուժի մեջ է 2008թ.-ի մարտի 20-ից:

⁴ ՀՀ-ում ուժի մեջ է 2006թ.-ի հունվարի 2-ից:

⁵ ՀՀ-ում ուժի մեջ է 2005թ.-ի դեկտեմբերի 17-ից:

⁶ ՀՀ-ի կողմից ստորագրվել է 2010թ.-ի սեպտեմբերի 29-ին:

⁷ Նման դեպքերում փոփոխվում է երեխաների պաշտպանությանն ուղղված հասարակական հարաբերությունները որպես հիմնական կամ լրացուցիչ օբյեկտ ընկալելու հարցը:

Վերը նշված փոփոխությունները չեն կարող չհանդրադառնալ երեխայի հոգեբանության վրա, ինչը կարող է հանգեցնել նաև դեհիանտ վարքագծի ձևավորմանը և հանցավոր արարքների կատարմանը: Բացառված չէ նաև, որ պատանեկության փուլում ինքնահաստատումը մղի հանցավոր արարքների կատարման նաև իրենցից թույլ անձանց նկատմամբ, ովքեր, տարիքային, հոգեբանական կամ այլ հանգամանքներից ելնելով, ի վիճակի չեն դիմադրություն ցույց տալու կամ չեն գիտակցում դրա անհրաժեշտությունը: Այս դեպքում առաջնահերթ թիրախ կարող է ընտրվել շրջապատում գտնվող մանկահասակը:

2016թ.-ին երեխայի դեմ կատարված հանցագործություններով ներգրավված 122 մեղադրյալներից 12-ն ունեցել են տարրական կրթություն, 95-ը՝ միջնակարգ, 2-ը՝ միջին մասնագիտական, 3-ը՝ բարձրագույն: Ինչպես երևում է, երեխաների նկատմամբ հանցագործություն կատարած անձանց համապատասխանաբար 1,6%-ը և 2,5%-ը կազմում են միջին մասնագիտական և բարձրագույն կրթություն ունեցող անձինք, ինչն անուղղակի վկայում է, որ բարձրագույն կրթությամբ անձինք առավել զգուշավոր և գիտակցված են մոտենում երեխաների իրավունքների պաշտպանությանը, չնայած չի բացառվում նաև լատենտայնության հանգամանքը:

122 մեղադրյալներից միայն 6-ն են նախկինում եղել դատապարտված¹:

Վարույթում գտնվող գործերով եղել են թվով 175 տուժողներ, որոնցից 47-ը՝ մինչև 12 տարեկան (26,9%), 14-ը՝ 12-14 տարեկան (8%), 72-ը՝ 14-16 տարեկան (41,1%), 42-ը՝ 16-18 տարեկան (24%):

2016թ. ընթացքում ավարտվել են երեխաների նկատմամբ կատարված հանցագործությունների վերաբերյալ 138 քրեական գործեր: 67 քրեական գործի վարույթ կարճվել է, որոնցից 45-ը՝ արդարացման հիմքով, իսկ 22-ը՝ ոչ արդարացման:

Մեղադրական եզրակացությամբ դատարան է ուղարկվել 71 քրեական գործ 83 անձի վերաբերյալ²:

Ինչպես երևում է վերը նշված վիճակագրությունից, երեխաների նկատմամբ կատարված հանցագործությունները թե՛ քանակական, թե՛ որակական հատկանիշներով բավականին մտահոգիչ են, ինչը հիմք է հանդիսանում այս հանցագործությունների ուսումնասիրությունն իրականացնել առավել համակարգված և ամբողջական:

Ինչպես նշվել է, երեխայի իրավունքների քրեաիրավական պաշտպանությունն ազգային օրենսդրության մակարդակով իրականացվում է բացառապես ՀՀ քր. օր.-ով: Մարդու դեմ ուղղված հանցագործություններից առանձնացված է ընտանիքի և երեխայի շահերի դեմ ուղղված հանցագործությունները, սակայն երեխաների իրավունքների քրեաիրավական պաշտպանությունն իրականացվում է ՀՀ քր. օր.-ի այլ գլուխներում նախատեսված հոդվածներով նույնպես:

¹ Այդ մեղադրյալները նախկինում դատապարտված են եղել ծեծի, բռնաբարության, 16 տարին չլրացած անձի հետ սեռական հարաբերություն ունենալու, անառակաբարո գործողության համար:

² Մեղադրական եզրակացությամբ դատարան ուղարկված գործերը վերաբերում էին 2-ը սպանությանը (հոդվ. 104), 7-ը դիտավորությամբ առողջությանը ծանր վնաս պատճառելուն (հոդվ. 112), 1-ը՝ դիտավորությամբ առողջությանը թեթև վնաս պատճառելուն (հոդվ. 117), 9-ը՝ նախատեսված ծեծին (հոդվ. 118), 1-ը՝ անզգուշությամբ առողջությանը միջին ծանրության վնաս պատճառելուն (հոդվ. 121), 5-ը՝ մարդուն առևանգելուն (հոդվ. 131), 1-ը՝ սպանության կամ առողջությանը ծանր վնաս պատճառելու, կամ զույք ոչնչացնելու սպառնալիքին (հոդվ. 137), 4-ը՝ սեքսուալ բնույթի բռնի գործողություններին (հոդվ. 139), 34-ը՝ սեռական հարաբերությանը 16 տարին չլրացած անձի հետ կամ սեքսուալ բնույթի գործողություններ կատարելը 16 տարին չլրացած անձի նկատմամբ (հոդվ. 141), 4-ը՝ անառակաբարո գործողություններին (հոդվ. 142), 1-ը՝ անձնական կամ ընտանեկան կյանքի մասին տեղեկություններ ապօրինի հավաքելուն, պահելուն, օգտագործելուն կամ տարածելուն (հոդվ. 144), 2-ը այլ հանցագործություններ են:

Առհասարակ, հաշվի առնելով ՀՀ քր. օր.-ի հողվածներում երեխաների պաշտպանությանը վերաբերող նորմների կառուցվածքային առանձնահատկությունները, երեխաների դեմ ուղղված հանցագործություններ բովանդակող նորմերը կարելի է բաժանել 3 խմբի՝

1) հողվածներ, որոնք վերաբերելի են միայն երեխաներին, օրինակ՝ ՀՀ քր. օր.-ի 106-րդ, 132.2-րդ, 165-րդ, 168-րդ և այլ հողվածներ,

2) հողվածներ, որտեղ անչափահասի նկատմամբ հանցանք կատարելը համարվում է ծանրացնող հանգամանք, օրինակ՝ ՀՀ քր. օր.-ի 119-րդ, 131-րդ, 133-րդ, 218-րդ և այլ հողվածներով,

3) հողվածներ, որոնք որևէ տարբերակում չեն նախատեսում անչափահասների վերաբերյալ, օրինակ՝ ՀՀ քր. օր.-ի 112-րդ, 129-րդ և այլն (ՀՀ քր. օր.-ի Հատուկ մասի հողվածների մեծամասնությունը):

Կախված այն հանգամանքից, թե երեխայի որ իրավունքի կամ շահի նկատմամբ է կատարվում ոտնձգությունը, նպատակահարմար է տարանջատել երեխաների նկատմամբ կատարվող հետևյալ հանցավոր արարքները՝

1) երեխայի կյանքի և առողջության դեմ ուղղված,

2) երեխայի ազատության, պատվի և արժանապատվության դեմ ուղղված,

3) երեխայի սեռական ազատության և սեռական անձեռնմխելիության դեմ ուղղված,

4) երեխայի այլ իրավունքների և շահերի դեմ ուղղված:

Երեխաների պաշտպանությունը պետք է իրականացվի ոչ միայն երեխաների համար անժանոթ (և հաճախ որպես վտանգավոր ընկալվող անձանց կողմից), այլ նաև այն անձանցից, որոնց վրա դրված է երեխայի խնամքի և/կամ դաստիարակության պարտականությունը:

2015թ.-ին ՀՀ քր. օր.-ի 138-142-րդ հողվածներով ՀՀ քննչական կոմիտեում քննվել է 71 քրեական գործ: Քրեական հետապնդման վիճակում գտնվող 71 անձանց գերակշիռ մասը տուժողների հետ գտնվել է փաստացի ամուսնական կապերի մեջ (30 քրեական գործ), 12 գործով տուժողները և ենթադրյալ հանցանք կատարած անձինք գտնվել են ընկերական հարաբերությունների մեջ, 9 դեպքում եղել են ծանոթներ, 7 դեպքում՝ հարևաններ, 5 գործով ենթադրյալ հանցանքը կատարվել է հոր կամ խորթ հոր, 2 գործով՝ տուժողի հարազատի (հորեղբոր որդու, մորաքրոջ ամուսնու), 1 դեպքում՝ մոր նախկին ամուսնու, 1 գործով՝ ուսուցչի, իսկ 4 դեպքում՝ անժանոթների կողմից:

Ընտանիքի ներսում (անչափահաս փաստացի կին-ամուսին, ծնող-երեխա) ոտնձգությունների դեպքերի առթիվ հարուցվել է 35 քրեական գործ, որը կազմում է գործերի 49,3%-ը¹:

Ինչպես երևում է, ՀՀ քր. օր.-ի 138-142-րդ հողվածներով 2015 թվականին ՀՀ քննչական կոմիտեում քննված գործերից միայն 4 անձ են տուժող երեխային անժանոթ եղել (ընդհանուր թվի 5,6%), չնայած եղել են համացանցային ծանոթություններ (16,9%): Սակայն այս դեպքում էլ ակնհայտ է, որ երեխայի նկատմամբ անժանոթ կամ փաստացի անժանոթ անձանց տեսակարար կշիռը սեռական հանցագործություն կատարած անձանց թվում չի գերազանցում մեկ քարորդը: Այստեղից կարելի է եզրահանգել, որ այն դիրքորոշումը, որ երեխան ապահով է իրեն զգում ընտանիքում, ոչ միշտ է համապատասխանում իրականությանը: Իհարկե, ասվածն ամենևին չի նշանակում, որ երեխաներն ընտանիքում անպաշտպան են և մշտապես ենթարկվում են բռնության, բայց, այնուամենայնիվ, կանխարգելիչ միջոցառումների պատշաճ իրականացումը խիստ անհրաժեշտ է:

¹ Տե՛ս «ՀՀ քննչական կոմիտեի վարույթում 2015 թվականին սեռական բնույթի հանցագործությունների վերաբերյալ քրեական գործերով նախաքննության ընթացքում անչափահաս տուժողների իրավունքների պաշտպանության վիճակի ամփոփում»: Երևան, 2016, էջեր 17-18:

2016թ.-ին ՀՀ քր. օր.-ի 138-142-րդ հոդվածներով ՀՀ քննչական կոմիտեում քննված գործերով տուժող է ներգրավվել 162 անձ, որոնցից 115-ը եղել են անչափահաս (տուժողների 71%-ը): Հանցագործության կատարման պահին տուժողներից 2-ը եղել են 5 տարեկան, 2-ը՝ 6 տարեկան, 1-ը՝ 7 տարեկան, 4-ը՝ 8 տարեկան, 3-ը՝ 9 տարեկան, 2-ը՝ 10 տարեկան, 5-ը՝ 11 տարեկան, 1-ը՝ 12 տարեկան, 7-ը՝ 13 տարեկան, 17-ը՝ 14 տարեկան, 48-ը՝ 15 տարեկան, 20-ը՝ 16 տարեկան, 3-ը՝ 17 տարեկան: Նման վիճակագրությունը վկայում է, որ սեռական հանցագործությունների դեպքում երեխաներն առավել խոցելի են, քան չափահասները, ինչը կրկին վերահաստատում է կանխարգելիչ արդյունավետ միջոցառումների իրականացման անհրաժեշտությունը:

Երեխաների դեմ ուղղված հանցագործություններն առանձնանում են ոչ միայն իրենց բնույթով, այլ նաև հանցագործությունների իրականացման մեխանիզմներով:

Երեխաների դեմ ուղղված հանցագործություն իրականացրած անձանց մի մասը խոստովանում է, որ երեխայի դեմ ուղղված հանցագործությունն իրականացրել է հաշվի առնելով երեխայի ֆիզիկապես թույլ լինելը կամ դեպքի վերաբերյալ այլ անձանց պատմելու երեխայի վախը:

Ելնելով երեխայի տարիքային, հոգեբանական և սոցիալական առանձնահատկություններից և հաշվի առնելով տարբեր տարիքային խմբերի երեխաների նկատմամբ կատարված հանցագործությունների ընկալումը և ազդեցությունը՝ ցանկալի է երեխայի դեմ ուղղված հանցագործությունները դասակարգել չորս խմբի՝ ըստ երեխայի տարիքային առանձնահատկությունների՝

- մանկահասակներ՝ մինչև 7 տարեկան երեխաների նկատմամբ կատարված,
- մանկահասակներ՝ 7-12 տարեկան երեխաների նկատմամբ կատարված,
- անչափահասներ՝ 12-16 տարեկան երեխաների նկատմամբ կատարված,
- անչափահասներ՝ 16-18 տարեկան երեխաների նկատմամբ կատարված¹:

Մանկահասակների դասակարգումը երկու խմբի պայմանավորված է այն հանգամանքով, որ «7-ից մինչև 12-14 տարեկան հասակն ընկած ժամանակահատվածն անհատին տանում է դեպի ավելի շատ ինքնուրույնություն: Այդ պահից երեխաները, մեծերի հետ համատեղ, յուրովի ձգտում են իրավահավասար հասարակություն ստեղծելու: Երեխան սկսում է իրեն ընկալել որպես տարբեր հնարավորությունների կրող, փորձում է կողմնորոշվել տարբեր հասարակական հարաբերություններում: Նա համեմատում է դրանց նշանակությունը և իրեն չափում է դրանցով: Դեպի զարգացում տանող այդ նոր քայլով ավարտվում է նախապատրաստությունը կյանքին, որն էլ կազմում է մանկությունը»²:

Անչափահասների դասակարգումը երկու խմբի պայմանավորված է նրանով, որ 16 տարեկանում երեխան ձեռք է բերում որոշակի ինքնուրույնություն և իրավունքներ, որոնց հիման վրա էապես փոխվում է նրա կարգավիճակը:

Ամփոփելով վերոգրյալը՝ կարելի է նշել, որ երեխաների դեմ ուղղված հանցագործություններն ունեն աճի միտում, փոփոխվում է այդ հանցագործությունների ինչպես քանակական, այնպես էլ որակական ցուցանիշները, և դրանց դեմ պայքարն առավել արդյունավետ դարձնելու համար նախևառաջ անհրաժեշտ է հստակեցնել երեխաների դեմ ուղղված հանցագործությունների շրջանակը, քրեականացնել այնպիսի արարքներ, որոնց քրեականացումը պահանջվում է ՀՀ կողմից վավերացված միջազգային պայմանագրերով, դասակարգել երեխաների դեմ ուղղված հանցագործությունները և հնարավորության դեպքում կողակորել դրանք ու այդ ամենի արդյունքում մշակել և կազմակերպել թիրախային պայքար յուրաքանչյուր տեսակի հանցագործության դեմ:

¹ Տե՛ս Դանթարյան Ա., Թումայան Դ. Երեխաների սեռական անձեռնմխելիության և սեռական ազատության դեմ ուղղված հանցագործություններն ու դրանց վարույթի առանձնահատկությունները. Եր., 2015, էջ 38:

² **Обухова Л.Ф.** Возрастная психология. М., 2000, էջ 65:

СОСТОЯНИЕ ПРЕСТУПЛЕНИЙ ПРОТИВ ДЕТЕЙ В РЕСПУБЛИКЕ АРМЕНИЯ И ИХ ОБЩАЯ ХАРАКТЕРИСТИКА

Давид Тумасян

*Начальник Управления правового обеспечения и статистики
Департамента Следственного комитета РА*

Статья посвящена общей характеристике законодательства РА о защите детей. В ней дана статистическая картина преступлений против детей в РА, указаны характерные данные указанных преступлений и их как количественные, так и качественные особенности. В статье раскрывается законодательно закрепленные формулировки уголовно-правовой защиты детей, а также классификация преступлений против детей.

STATE OF THE CRIMES AGAINST CHILDREN IN THE REPUBLIC OF ARMENIA AND THEIR COMMON FEATURES

David Tumasyan

*Head of the Legal and Statistics Department of the RA
Investigative Committee, Candidate of Legal Sciences*

The article is devoted to the common features of the RA legislation on the protection of children. It provides statistics of crimes against children in the RA, specifies the characteristics of these crimes and their quantitative and qualitative features. The article reveals the legislatively established formulations of the criminal-legal protection of children, as well as the classification of crimes against children.

Բանալի բառեր – երեխաների դեմ ուղղված հանցագործություններ, երեխաների քրեաիրավական պաշտպանություն, երեխայի իրավունք, երեխայի պաշտպանության մասին օրենսդրություն, երեխայի դեմ ուղղված հանցագործությունների վիճակագրություն, երեխաների դեմ ուղղված հանցագործությունների դասակարգում

Ключевые слова: преступления против детей, уголовно-правовая защита детей, права детей, законодательство о защите детей, статистика преступлений против детей, классификация преступлений против детей

Key words: crimes against children, criminal-legal protection of children, children's rights, legislation on child protection, statistics of crimes against children, classification of crimes against children